

PRIKAZ SEMINARA "PRAVO NA OBRAZLOŽENU SUDSKU ODLUKU REDOVNIH SUDOVA U BOSNI I HERCEGOVINI U GRAĐANSKOJ OBLASTI" (BRČKO, 11. 05. 2018. GODINE)

prikaz

Priredili: **mr. sci. Arben Murtezić***
dr. sci. Davor Trlin**

U Brčkom je, dana 11. 05. 2018. godine, u zajedničkoj organizaciji entitetskih centara za edukaciju sudija i tužilaca i Pravosudne komisije Brčko distrikta BiH, održan seminar na temu „Pravo na obrazloženu sudsku odluku redovnih sudova u Bosni i Hercegovini u građanskoj oblasti“. Ovo je drugi skup na ovu temu u recentno vrijeme, a prvi je održan dana 06. i 07. novembra 2017. godine u Sarajevu u organizaciji Ustavnog suda Bosne i Hercegovine i AIRE Centra iz Londona, a uz saradnju Visokog sudskog i tužilačkog vijeća Bosne i Hercegovine, u formi pravosudnog foruma o nacionalnoj interpretaciji EKLJP (koji je od ove godine i sastavni dio Programa stručnog usavršavanja CEST-a F BiH). Seminar u Brčkom je, nakon što su učesnike pozdravili predstavnici organizatora, upravo i počeo tako što je sekretar Pravosudne komisije BD BiH učesnike podsjetio na preporuke koje su donesene na pravosudnom forumu 2017. godine (ukupno 17).

Pravo na pravično suđenje sadrži garancije nastale kroz praksu Evropskog suda za ljudska prava. Jedan od elemenata ovog prava ustanovio je i pravo na obrazloženu sudsku odluku. Na seminaru su se detaljno analizirali standardi prava na obrazloženu sudsku odluku koji su razvijeni u praksi ESLJP-a, sa posebnim osvrtom na njihovu primjenu i domet u praksi redovnih sudova u građanskoj oblasti u BiH. Ovim je ispunjen i cilj seminara - unapređenje saradnje među sudskim instancama u BiH i harmoniziranje sudske prakse u BiH, kako bi ona bila ujednačena s evropskim standardima, a čime će doprinijeti pravnoj sigurnosti svih građana u BiH.

* *Direktor Javne ustanove Centar za edukaciju sudija i tužilaca u Federaciji BiH.*

** *Viši stručni saradnik Javne ustanove Centar za edukaciju sudija i tužilaca u FBiH;
davor.trlin@cest.gov.ba*

Na seminaru se govorilo posebno o: pravu na pravično suđenje, standardima EKLJP u vezi sa pravom na obrazloženu sudsku odluku, praksi sudova u BiH u kontekstu ovih standarda, kvalitetu sudskih odluka, pravnoj sigurnosti i zaštiti prava građana u BiH.

Edukatore na seminaru su bili: gosp. Staka Gojković, sudija Vrhovnog suda RS-a i gosp. Dragana Tešić, sudija Apelacionog suda BD BiH. Gosp. Gojković je govorila o pravu na obrazloženu sudsku odluku kao elementu prava na pravično suđenje iz člana 6. Evropske konvencije o zaštiti ljudskih prava i osnovnih sloboda, a gosp. Dragana Tešić o pravu na obrazloženu sudsku odluku u praksi redovnih sudova u BiH iz građanske oblasti. Oba izlaganja praćena su aktivnim diskusijama. Ciljna grupa su bile sudije koje rješavaju građanskopravne sporove iz cijele BiH.

1. Sudske odluke moraju biti obrazložene navođenjem izričitih razloga za odluku koja je u konkretnom sporu donesena jer pravo na obrazloženu sudsku odluku štiti pojedinca od proizvoljne primjene prava;

2. Neophodno je da sudska odluka bude zasnovana na nacionalnom pravu a pod nacionalnim pravom se podrazumijeva i obavezujuće tumačenje Ustavnog suda;

3. Kvalitet razloga jeste u domenu slobode suda da ocjenjuje dokaze i tumači pravo ali da presuda bude jasno formulisana;

4. Nakon pravosudnog foruma 2018. u organizaciji Ustavnog suda Bosne i Hercegovine i AIRE Centra iz Londona, a uz saradnju Visokog sudskog i tužilačkog vijeća Bosne i Hercegovine i nakon izrade vodiča kako obrazložiti sudsku odluku koji je u proceduri, izvjesno možemo očekivati da će u dogleđno vrijeme mogućnost obavljanja sudijske funkcije biti uslovljena ispunjavanjem zadatka da odluka ima adekvatno obrazloženje.